



HUDUDLARNING “O‘SISH NUQTALARI” BELGILAB OLINGANI ODAMLARNING HAYOTDAN ROZI BO‘LIB YASHASHIGA XIZMAT QILAYOTIR

Prezident Shavkat Mirziyoyev hududlar iqtisodiyoti, muhim ijtimoiy dasturlar ijrosi bilan tanishish maqsadida 16-noyabr kuni Surxondaryo viloyatiga keldi.



Dastlab buyuk olim Hakim at-Termiziy maqbarasi ziyorat qilindi. Qur'on tilovat etilib, yurtimizga tinchlik, xalqimizga farovonlik tilandi. Ulamolalar bilan suhbatda bugungi tahlikali zamonda sodir bo'layotgan turli nizo va urushlar tufayli begunoh insonlar qoni to'kilayotgani qayd etildi. Bu yurtimizdagi tinchlik-osoyishtalik qadri yanada teran anglatib, insonda shukronalik ruhini uyg'otadi. Bunday ulug' ne'matlar ahamiyatini, Termiziy kabi bobolarimiz ilm-ma'rifatini yoshlarga yetkazish muhimligi ta'kidlandi. Shu masalalar bo'yicha Termizda ilmiy konferensiya o'tkazish taklifi ilgari surildi.

Viloyat iqtisodiyoti so'nggi yillarda zamonaviy sanoatni yo'lga qo'yish, oziq-ovqat mahsulotlarini qayta ishlash, qurilish materiallari ishlab chiqarish va tekstil sohasini rivojlantirish, qishloq xo'jaligi mahsulotlari yetishtirish hajmini oshirish orqali yanada yuksalmoqda.

Davlatimiz rahbarining bevosita g'oyasi asosida janubdagi voha salohiyatidan kelib chiqib, hududlarning "o'sish nuqtalari" belgilab olingani odamlarning turmush darajasini oshirib, tinch, to'kin hayotidan rozi bo'lib yashashiga xizmat qilayotir. Prezidentimizning joriy yil 13-mart kuni viloyatga tashrifi chog'ida hududni ijtimoiy-iqtisodiy rivojlantirish yuzasidan belgilab bergan vazifalari ijrosi ham yurt obodligi va Surxon ahlining farovon hayotini ta'minlashda muhim omil bo'lmoqda. Jumladan, yilning o'tgan 9 oyida viloyatda yalpi hududiy mahsulot 29,4 trilyon so'mni tashkil etib, o'sish sur'ati 105,2 foizga yetdi. Sanoat mahsulotlari ishlab chiqarish 5,9 trilyon so'mni, xalq iste'mol mollari ishlab chiqarish hajmi 1,7 trilyon so'mni, pudrat ishlari 5,2 trilyon, qishloq xo'jaligi mahsulotlari 24,2 trilyon, xizmatlar hajmi 11 trilyon so'mni tashkil etdi. Aholi jon boshiga

hisoblaganda yalpi hududiy mahsulot hajmi 10,4 million so'mga yetkazilib, o'tgan yilning mos davriga nisbatan 102,7 foizga o'sish ta'minlandi. 161,8 million dollarlik mahsulot eksport qilindi. Ishlab chiqarilayotgan raqobatbardosh mahsulotlar Xitoy, Rossiya, Pokiston, Turkiya, Afg'oniston, Qozog'iston kabi dunyoning 27 davlatiga eksport qilinmoqda. Dasturlar asosida 1,3 milliard dollarlik 1 ming 36 loyiha amalga oshirilmoqda.

Viloyat iqtisodiyotida yuz berayotgan bunday olamshumul o'zgarishlar odamlarning bandlik masalasini hal etish, barcha zamonaviy qulayliklarga ega uyjoylar qurish, yo'llar, ta'lim, tibbiyot va boshqa ijtimoiy soha obyektlarini tubdan rekonstruksiya qilish, yangilarini barpo etish singari ishlar ko'lamini kengaytirdi. Masalan, o'tgan yilning 9 oyida 203 ming 300 ish o'rni tashkil etilgan bo'lsa, joriy yilning shu davrida 353 ming 300 ta ish o'rni yaratildi.

Yaqin yillarda ham agrar hudud bo'lgan viloyat iqtisodiyoti yuksalib, daromad manbai oshayotgani kambag'allik darajasini 13,8 foizdan 11,2 foizga kamaytirdi.

Prezident Shavkat Mirziyoyev tashrif doirasida Boysun tumanida bo'lib, xalqimiz farovonligiga xizmat qiladigan yirik loyihalardan biri — "Mustaqillikning 25 yilligi" gaz-kimyoy majmuasi qurilishi bilan tanishdi.

Bu yerda gaz koni bir necha o'n yillar oldin topilgan. Biroq geografiyasi murakkabligi, o'sha paytda zamonaviy texnologiya va mablag' bo'lmagani uchun kon o'zlashtirilmagan. Prezidentimiz Shavkat Mirziyoyev qat'iyligi bilan bu borada amaliy qadamlar tashlandi. Davlatimiz rahbari 2019-yil aprel oyida bu yerda bo'lib, dastlabki qidiruv va texnik-iqtisodiy asoslar bilan tanishgan edi. O'sha yilning dekabr oyida zavodni qurish ishlari boshlandi. "Surhan Gas

Chemical Operating Company" xorijiy korxonasi tomonidan amalga oshirilayotgan ushbu loyihaning qiymati 2,9 milliard dollar. Majmua yiliga 5 milliard metr kub gazni qazib chiqarish va qayta ishlash quvvatiga ega bo'ladi. Hozirgacha konni o'zlashtirishga 1 milliard 450 million dollarlik investitsiya kiritilib, 20 ta quduqda burg'ilash ishlari yakunlangan. 11 ta gaz qudug'i sinovdan muvaffaqiyatli o'tgan. Poydevor ishlari va metall konstruksiyalar qurish deyarli yakuniga yetgan.

Zavod loyihalari va qurilishi "Shell" kompaniyasining litsenziyalangan texnologiyalari asosida olib borilmoqda. U eng ilg'or ekologik talablarga mos bo'lib, ishlab chiqarishdagi zararli chiqindilarni 99 foiz zararsizlantirish imkoniyatiga ega. Bunday uskunalar MDH davlatlari ichida birinchi bor ushbu zavodga o'rnatilmoqda. Yana bir muhim jihati, zavod elektr energiyani ham o'zi generatsiya qiladi va tuman aholisiga yetkazib beradi.

Davlatimiz rahbari shu yerda geologik qidiruv va seysmik tadqiqot ishlari yakunlari bilan tanishdi. Investorlar, konni o'zlashtirishda qatnashayotgan mutaxassis va quruvchilar bilan suhbatlashdi.

— Asosiy maqsad gazni xom-ashyo holatida sotish emas, uni qayta ishlash, qo'shimcha qiymatli mahsulotlar olish bo'lishi lozim. Investitsiya tez vaqtlarda o'zini oqlab, zavod raqobatbardosh bo'lishi uchun oxirgi mahsulot sifatli va yuqori daromadli bo'lishiga erishish kerak, — dedi Shavkat Mirziyoyev.

Bu bo'yicha qaror ishlab chiqish vazifasi qo'yildi. Majmua Boysun shahridan 20 kilometr uzoqda joylashgan. Ayni paytda uning qurilishida 7 mingdan ortiq kishi, maxsus texnikalar ishlamoqda. Loyihaning birinchi bosqichi kelgusi yil may oyida ishga tushiriladi, 2025-yilda to'la quvvatga chiqadi.

[Davomi 2-betda](#)

O'zbekiston Respublikasi Prezidentining F A R M O N I

“NAVOIY KON-METALLURGIYA KOMBINATI” AKSIYADORLIK JAMIYATI TASHKIL ETILGANING 65 YILLIGI MUNOSABATI BILAN ISHLAB CHIQRARISH ILG'ORLARIDAN BIR GURUHINI MUKOFOTLASH TO'G'RISIDA

Mamlakatimizning iqtisodiy qudratini yuksaltirish, kon-metallurgiya sanoatini zamonaviy texnologiyalar asosida rivojlantirish, murakkab ish va iqlim sharoitlarida mineral boyliklarni samarali o'zlashtirish, tarmoqning barqaror ishlashini ta'minlash, jahon andozalariga mos yangi korxonalarini tashkil etish borasidagi katta xizmatlari, ko'p millatli mehnat jamoasida do'stlik va hamjihatlikni mustahkamlash, yuqori malakali kadrlarni tayyorlashga qo'shgan munosib hissasi uchun quyidagilar mukofotlansin:

“O'zbekiston Respublikasida xizmat ko'rsatgan sanoat xodimi” faxriy unvoni bilan

Ganiyev Yuldash Urinovich — “Navoiy kon-metallurgiya kombinati” aksiyadorlik jamiyatining Markaziy

kon boshqarmasi markaziy ta'mirlash-mexanika sexi boshlig'i

“Do'stlik” ordeni bilan

Ahadov Xayrulla Rofiyevich — “Navoiyuran” davlat korxonasi bosh geologi

Baxronov Farxod Shayimovich — “Navoiy kon-metallurgiya kombinati” aksiyadorlik jamiyati bosh direktorining investitsiyalar va kapital qurilish bo'yicha o'rinbosari

Janaxmetov Serijan — “Navoiy kon-metallurgiya kombinati jamg'armasi” davlat muassasasining “Navoiy” hududiy boshqarmasi “Farhod” madaniyat saroyi yakkaxon xonandasi

Kuleshov Andrey Dmitriyevich — “Navoiy kon-metallurgiya kombinati” aksiyadorlik jamiyatining Markaziy kon boshqarmasi “Muruntog” koni burg'ilash qurilmasi mashinisti

Pogosskaya Albina Rishatovna — “Navoiy kon-metallurgiya kombinati” aksiyadorlik jamiyatining Zarafshon qurilish boshqarmasi 4-avtokorxonra kran mashinisti

Sadinov Shuxrat Mardonovich — “Navoiy kon-metallurgiya kombinati” aksiyadorlik jamiyati bosh marksheyderi

Turganbayeva Guljamila Urazbayevna — Navoiy kon-metallurgiya kombinati aksiyadorlik jamiyatining Shimoliy kon boshqarmasi 3-Gidrometallurgiya zavodi quyultirish, sanoat chiqindilarini zararsizlantirish va reagentlarni tayyorlash sexi katta ustasi

Soy Maya Vasilyevna — “Navoiy kon-metallurgiya kombinati” aksiyadorlik jamiyatining Shimoliy kon boshqarmasi byudjetlashtirish va kontrolling bo'limi boshlig'i

[Davomi 2-betda](#)

O‘ZBEKISTON STRATEGIYASI | 2030

TASHQI SIYOSIY STRATEGIYA FALSAFASI

xalq manfaatlarini va tinchliksevarlik tamoyilida aks etadi

Jahon maydonida sodir bo'layotgan tub o'zgarishlar, xususan, geosiyosiy ta'sir doiralari “qayta taqsimlash”ga urinishlar, qurolli ziddiyatlar va buning oqibatida yuzaga kelayotgan davlatlararo ishonchsizlik jarayonlarining tobora kuchayib borishi zamonaviy xalqaro tartibot tizimi izdan chiqishiga sabab bo'lmoqda. Shunday ekan, konstruktiv hamkorlikni yo'lga qo'yish va tinchliksevar tashqi siyosatni amalga oshirish har bir davlat oldida turgan dolzarb vazifaga aylanib ulgurdi.

Xalqaro munosabatlar tizimidagi mazkur o'zgarishlar O'zbekiston milliy manfaatlarini izchil himoya qilish va tashqi siyosiy strategiyani shu asosda yo'lga qo'yishni taqozo etmoqda. Mamlakatimiz tashqi siyosati ochiq va pragmatik xarakterga ega bo'lib, u suveren tenglik, o'zaro manfaatli hamkorlik, tinchliksevarlik, ahil qo'shnichilik va umume'tirof qilingan xalqaro normalarga sodiqlik tamoyillarini o'zida mujassam etadi.

[Davomi 3-betda](#)

